

欽定剿平粵匪方略

欽定勦平粵匪方略卷三百十八 壬戌年

八月十六日

丙寅

李鴻章奏言青浦爲蘇州門戶

賊所必爭自克復後副將程學啟入城布守卽

據諜報僞忠王李秀城調蘇崑嘉興等處賊衆

十餘萬由西北兩路撲犯七月十九二十等日

僞蕃王譚姓率二萬餘衆直撲青浦西門經黃

翼升礮船擊退二十五日繞撲北崑山營盤副

將滕嗣武等堅壁靜守乘該逆填橋渡水之際
槍礮環施斃賊目數名適水師礮船駛抵西南
河橋併力轟擊而鳳凰塘橋各營亦整隊來接
賊卽敗走該逆旣不得逞於青浦復以大股僞
攻北新涇該處爲上海西路衝要先經 派已
革總兵況文榜等統率兵勇駐紮二十七日逆
衆數千由張官渡過河猛撲我軍開礮力拒殪

賊不少副將梁安邦等督隊夾擊火器齊發該
逆仍無退志二十八日臣派隊前往助剿都司
劉玉林衝入賊隊生擒十餘名斬賊酋二人賊
爲披靡劉玉林率數十人逐之中槍落馬賊矛
環刺登時陣亡守備熊得春亦歿於陣八月初
一日各路賊衆環撲北新涇營營內糧藥缺乏
賊越營後擾及法華之西距上海僅十餘里臣

令副將張遇春等分督隊伍嚴陣於法華左右
副將王東華督帶礮船由洋涇濱駛過曹家渡
毀賊浮橋三座斃匪數百復揮衆登岸衝殺將
至北新涇張遇春亦由陸路派隊來應賊退數
里其法華街西之賊經都司苗順清馬隊衝潰
查該逆大股十餘萬屬集近郊臣所部得力兵
勇不過萬餘除分防各路外存滬營者僅二三

千人兵力實形單薄現飛調劉銘傳吳建瀛四營由金山衛拔隊回援程學啟滕嗣武韓正國等各帶所部由青浦北蕪山分路夾擊又調華爾常勝軍由松江來滬據蘇松太道吳煦稟報華爾並約會英法各兵合力迎擊其北新涇營仍密飭況文榜等鎮靜嚴守俟各路兵勇調齊卽會合洋兵分路援剿所有陣亡都司劉玉林

守備熊得春均請

旨飭部從優議卹以慰忠魂奏入

上命議政王軍機大臣傳諭李鴻章曰蘇崑嘉興等處賊匪分股撲犯青浦縣城及北崑山北新涇營盤爲牽掣我師之計李鴻章現調劉銘傳等四營回援並飭程學啟等帶兵分路夾擊卽著嚴飭各該員弁迅速援剿務將大股悍賊悉數殄滅肅清

滬防李鴻章所部得力兵勇不過萬餘除調防各路外存營兵數太單既據華爾約會英法各兵合力迎擊卽著李鴻章相機妥辦以厚兵力而掃賊氛況文榜係革職拏問之員該撫令駐北新涇防堵恐未必能得力自應仍遵前旨解赴左宗棠軍營候審所管防務卽揀派妥員前往接替

上諭內閣曰逆匪竄偏滬防經官兵奮力攻擊都司

劉玉林守備熊得春俱歿於陣實堪憫惻均著交部從優議卹

同日英桂奏言探報南陽解圍髮捻大股直竄河洛八月初四日已至洛陽之周莊並擾及嵩宜界內之白楊樹村勢甚猖獗該村距陝州僅二百餘里與晉接壤晉省防兵數止六千近甫將南路防兵抽調赴西而南路警報又至實屬

防不勝防可否

飭催多隆阿速帶楚軍馳至河洛力扼竄匪

英桂又奏言晉省防兵單薄將領乏人其最爲
得力之前署蒲州協副將珠爾杭阿遊擊興岱
等均赴陝協剿回匪現南陽敗寇竄近晉邊已
派代理蒲州協副將鄧鳳林抽撥防兵五百名
馳赴茅津渡都司海長帶兵三百名赴芮城縣

所轄之曲里渡加意巡防以杜竄越此外旣無可遣之將又無可調之兵查勝保所派援陝之軍現抵朝邑勢已不孤臣擬飭珠爾杭阿等管帶所部官兵回晉防堵奏入

上命議政王軍機大臣傳諭勝保鄭元善英桂曰南陽解圍髮捻大股直竄河洛著鄭元善剋期出省調集兵勇馳赴洛陽遏賊北竄如兵力尙嫌不足

李續燕一軍亦可迅速調派前往併力扼剿鄭元善帶兵出省汴城不免空虛著毛昶熙迅帶兵勇回顧省垣仍激勵鄉團會同官軍及在城文武妥籌防剿勝保前派駐紮洛陽之兵著卽歸鄭元善調度以厚兵力山西沿河隘口在在均關緊要英桂務當就現有兵勇實力防堵並著勝保檄令副將珠爾杭阿等兵折回晉省以資防剿

集賢堂不問卷三十一
十七日丁卯署安徽巡撫李續宜奏言臣才識凡庸濫膺疆寄茲因臣母之喪仰荷

殊恩異數臣卽捐糜頂踵不足仰酬又何敢妄行瀆

請惟臣區區愚忱勢處萬難有不敢不瀝陳於

聖主之前者臣父今年七十有四臣母今年七十有

七臣自咸豐三年效力戎行歸省時少咸豐九

年臣自湖北回援寶慶迨後班師還鄂便道省

親其時 臣母卽患風痺之證呻吟牀席 臣父齒髮益衰而曾國赫胡林翼羽書屢至 臣母謂 臣曰軍務方殷速出報

國毋以我病羈留俟軍務稍鬆再乞假歸省可也語畢母子痛哭不能禁其後 臣在軍營屢接家信皆云 臣母病證反覆無常 臣久欲乞歸顧以時事多艱受

恩未報欲陳復止者屢矣因循四載卒遭大故抱憾
終天百身莫贖此臣不孝之罪每一念及中心
如割者也聞臣父近年血氣愈衰殊非早歲康
強可比臣自去年五月患心熱乾咳自秋徂冬
復添咯血之疾幾瀕於危本年春夏漸見輕減
五月二十六日舊疾復作臣以

天恩高厚賊燄猶熾一息尙存強支病軀治事未敢

乞一日之假圖此身之安六月杪病勢稍輕似
有轉機七月初六日聞訃丁憂旣慟臣母之棄
養復憂臣父之更衰百病俱發卽強抑悲哀亦
覺日形疲憊難副

委任之重若非離營靜養病必難痊臣年甫四十報
國之日方長籲懇

天恩准臣回籍奔喪稍伸哀痛之情懇臣父倚闥之

望臣心稍安卽當力疾仍赴軍營殫竭血誠力
圖報稱至袁甲三病勢較重難再留營更替乏
人

朝廷以此爲念臣亦何敢不悉心思議敬舉所知
仰候

聖裁查有湖北布政使唐訓方寬厚恂謹辦事認真
久歷戎行諳悉戰守事宜如蒙

天恩令其駐紮臨淮接統袁甲三一軍當可保全要
區奏入

上命議政王軍機大臣傳諭官文曾國藩袁甲三李
續宜唐訓方曰李續宜瀝陳哀悃願懇賞假回籍
奔喪已降旨賞假百日准其回籍矣皖省粵逆雖
就肅清軍務未可稍鬆曾國藩現值進剿金陵調
度喫緊皖北關繫緊要必須得人督辦俾曾國藩

專意東征據李續宜奏稱唐訓方久歷戎行熟諳
戰守著官文速飭該藩司前赴安慶接署安徽撫
篆毋稍遲延其應否駐紮臨淮接統袁甲三一軍
之處著會國藩酌度具奏李續宜俟唐訓方到皖
交卸後方可起程回籍毋得過於迫切致誤戎機
袁甲三仍遵前旨力疾從公妥籌辦理所有欽差
大臣關防俟李續宜假滿回皖再行交卸

上諭內閣曰前因安徽巡撫李續宜丁憂降旨改爲
署理毋庸給假回籍茲據李續宜奏瀝陳哀悃願
懇賞假回籍奔喪俾得稍伸哀痛之情慰伊父倚
聞之望仍卽前赴軍營力圖報稱等語覽其所奏
情詞懇切出於至誠且該撫舊病未痊若令在營
穿孝強抑悲哀非所以示體恤現在安徽巡撫已
派唐訓方暫行署理李續宜著賞假百日准其回

籍治喪假滿後卽行馳赴安徽軍營接署撫篆安
徽軍務甫經就緒鎮撫機宜在在需人李續宜著
俟唐訓方馳抵署任後再行回籍該撫當仰體朝
廷破格奪情之意務以軍事爲重毋再瀆請

同日馮子材奏言句容逆匪添糾丹陽寶堰白
兔匪黨萬餘分屯湯岡黃岡等處意在乘虛內
犯鎮城偵我有備未敢逞志惟於離城數十里

內外往來窺伺七月二十五六等日該逆由高
資後山潛出馬隊數百直撲江濱守備李庚照
管駕艇船輪流開礮擊斃逆黨多名二十九日
湯岡各路之賊約千餘名竄至六擺渡總兵陶
茂森派撥所部會同民團擊退八月初三日復
有大股潛竄六七擺渡陶茂森派隊扼守御河
連開槍礮擊斃黃衣逆目多名賊衆敗遁初五

日西南逆股分竄駙馬莊一帶意在東擾越河
丹徒鎮等處當飭總兵黃朝恩督帶馬隊迎頭
截勦該逆退回長山湯岡一路我軍收隊回營
查金陵賊勢漸蹙旬容係逆巢門戶賊料官軍
必乘虛進取故多聚羽翼以牽掣之無非誘我
懸軍深入以圖前後包抄幸官軍先事豫防計
無所逞臣仍嚴飭水陸鎮將遠探近守並察看

上游軍情隨時知會都興阿聯絡聲勢相機進
攻奏入

上命議政王軍機大臣傳諭馮子材曰金陵賊勢日
見窮蹙句容等處之賊更番出擾希圖牽掣我師
鎮江爲南北咽喉久爲賊所覬覦自當審度萬全
以固根本著該提督激勵將士以守爲戰不可懸
軍深入致爲逆匪所乘

二十一日辛未曾國藩奏言臣疊奉

諭旨垂詢各路軍情謹就聞見所及分條具陳一多

隆阿一軍初克廬州時臣本欲其會攻金陵不

料陝西告警官文等奏請多隆阿率師援秦而

諭旨亦飭令先保陝西臣雖覺金陵兵單事機可惜

然以秦晉爲餉源所出未敢奏調多隆阿西援

之師轉而東征也厥後粵逆回竄秦事稍鬆而

漢回離殺望援仍切其時甯國已克南岸兵力
足敷調遣臣因咨達多隆阿不必回顧蘇皖或
速勦陝省或留駐河南請其定計嗣多隆阿軍
抵襄陽由光化荆子關入秦本不至爲南陽之
賊所阻南陽賊匪經鄂軍會勦解圍亦尙不至
爲楚疆之患勝保前次奏報殊未確實致

朝廷久經派定援秦之局又復中變多隆阿接奉

毋庸入陝之

旨不知從何處折回若已抵秦境則進退兩難若果
回鄂疆自當遵

旨駐紮南陽一帶食鄂省之餉擊豫省之賊凡有竄
入南汝兩府者責成多隆阿攔截痛剿西可屏
蔽秦中南可保障楚省北可聯絡鄭元善葉裕
之師東可聯絡蔣凝學潁州之師誠爲一舉而

數善皆備至於防守廬州石清吉本係多隆阿部將不須該將軍前往駐守圍攻金陵總超已定由東壩前進不須該將軍遽往會勦誠以鄂豫秦三省交匯之區不可無大枝勁旅爲游擊之師非謂江南不必添兵也一裏下河一帶屢塵

聖懷江南之賊若由常熟江陰偷渡北岸之靖江如

身之學問之田文三十一
一
皋通州海門等處實屬防不勝防頃接李鴻章
咨稱探得僞普王楊輔青自甯國敗回僞護王
陳坤書自揚州敗回均至蘇城與僞忠王商議
金陵危急皖浙官軍分路進剿上游已無路可
竄欲分大股由江陰福山楊林各口窺竄江北
裏下河就食完善之區等語李鴻章已奏請

飭都興阿黃彬等嚴防以臣愚見都興阿兵力祇有

此數紅單船勇丁不甚可靠是江北應防要地
尙無專汛派防之水師臣現咨商楊岳斌囑其
親赴下游徧歷靖江如皋通州海門數百里江
面察看要衝妥籌布置又擬令太湖水師造船
一百六十號防勦上海松江由澱湖以入蘇州
而以黃翼升水師專防淮揚裏下河一帶星夜
趕辦計四箇月可以集事目下太湖水師尙未

辦就黃翼升不可離滬所有裏下河之防應請
飭部與阿黃檄引爲專責臣亦當力籌兼顧仍請

飭下僧格林沁吳棠如賊果竄裏下河卽於清江浦
嚴兵以待此等敗殘股匪不難一戰殲之一李
世忠一軍前奉

諭旨歸臣節制調度查李世忠投誠之初勝保奏明
准帶一萬八千人實數蓋近三萬近又陸續增

至五六萬於長淮五河等處設釐卡數處長江
新河口設釐卡一處各縣亦有卡局所獲頗厚
又廣運鹽斤自捆自賣相沿已久非另籌鉅款
按月供支以養其衆勢難驟繩以法且去冬今
春克復天長六合浦口江浦擊退陳坤書股匪
於大局不爲無功未可沒其勞而遽議其後臣
擬姑循其舊至該軍餉需專盼粵東釐金聞晏

端書到粵事多掣肘若該省釐金不能大有起
色不特皖浙欠餉無出卽李世忠一軍亦難籌
接濟一鎮江一軍前奉

諭旨飭臣統籌兼顧頃准馮子材函商一切臣覆函
以鎮江餉絀兵單祇宜固守不宜出戰待鮑超
攻克東壩溧陽溧水句容等處屯駐金陵之東
北能與鎮江聯絡一氣不爲賊氛所梗屆時馮

子材再行撥兵會勦庶幾聲勢聯絡士氣易奮
至李鴻章久有移紮鎮江之意無如松滬一帶
戰爭不休觀忠逆之志似欲甘心於滬上李鴻
章有萬不可離滬之勢或俟太湖水師辦成李
鴻章卽統水陸諸軍由松滬進兵入蘇亦屬因
利乘便之法所有鎮江防勦應始終責成馮子
材耐苦堅守不作出勦之計以上四條臣勉竭

愚慮未審當否

曾國藩又奏言僞保王童容海率衆乞降襲取
廣德州城臣本擬酌留二千人餘悉遣散旋據
鮑超來文童容海旣取州城襲殺守賊僞閩天
義馬桂功並收其衆一律薙髮不下六七萬人
請多留降卒立爲啟化營以資攻勦並轉據童
容海自陳本係洪姓請卽更正等情臣以洪容

海自拔來歸應准復還本姓惟所部過衆因令
挑留三千人編立五營餘悉遣散飭總兵宋國
永已革知府曾詠妥爲辦理各繳軍械發給護
照川資擇其明幹頭目帶領由陸路分起回籍
果能沿途約束一無滋擾俟該頭目等回營准
其錄用酌予保獎當不至變生意外至洪容海
數年被擄一旦自新乃能計取堅城襲殺守賊

力圖晚蓋非假以虛名恐不足以馭下合無仰
懇

天恩賞給洪容海遊擊虛銜其部下頭目一併開列
請分別

賞給五六品頂戴俟續有勞績由臣分別奏保官階
使悔罪投誠者知

朝廷有倖邀之

寬典無顧惜之功名則東南逋寇或皆聞風知勸瓦
解冰消

曾國藩又奏言近日金陵賊匪未撲官軍營盤
曾國荃因營中病勇過多亦未進攻鮑超克復
甯國已逾月餘現值天氣稍涼卽當催令進兵
左宗棠在浙亦苦營中患病者多未甚得手僞
侍王李侍賢現在金華修城治濠並調溫處之

賊萃於該郡爲死守計龍游縣城雖已檄調劉培元等軍進攻該處地勢平衍難以偏城立營一時未能速下蔣益漴一軍七月十六日已入江西萍鄉縣境日內當可陸續抵浙奏入

上命議政王軍機大臣傳諭曾國藩曰多隆阿援陝之師自廬州拔營後兩月未見官文等奏報而陝省望援甚急是以改派勝保督辦陝西軍務嗣因

多隆阿有入陝消息復令勝保專辦渭北回匪多
隆阿專辦渭南回匪現在勝保已抵臨潼多隆阿
計亦可到西安俟陝境回匪勦平後卽著照該大
臣所擬令該將軍駐紮南陽一帶俾鄂豫秦三省
交匯之區得此大枝勁旅於全局甚有裨益曾國
藩探悉僞普王等有偷渡江北之意已嚴飭都興
阿等督率水師實力防守並令吳棠嚴軍以待豫

備不虞僧格林沁所部馬步各隊分勦皖豫山東
捻匪已屬不敷調遣恐難再撥勁旅駐守清江現
仍諭令該親王審度機宜妥爲籌辦裏下河尙稱
完善逆匪垂涎已久萬一場輔青等股率衆渡江
該大臣務當力籌兼顧毋稍大意曾國藩現派楊
岳斌親赴下游察看江面衝要著飭令妥籌布置
太湖水師戰船辦成後卽令黃翼升一軍專防淮

揚裏下河一帶所籌均合機宜著卽妥爲辦理至
所稱李世忠一軍須另籌鉅款按月供支等語已
寄諭勞崇光晏端書將粵東釐金迅速妥辦昨據
馮子材奏逆匪撲犯鎮防官軍擊退諭令馮子材
以守爲戰不可懸軍深入本日曾國藩奏稱鎮江
餉缺兵單祇宜固守不宜出戰與寄諭適相脗合
復諭令該提督嚴守鎮城俟鮑超攻克東壩等處

師抵金陵後再行撥兵會剿仍著曾國藩隨時授以機宜以期萬全無失近據李鴻章奏蘇城大股逆匪攻撲青浦滬防喫緊是李鴻章一時斷難移軍赴鎮浙省逆匪以全力扼守金華官軍進攻龍游尙難得手現在廣德州城收復徽防更可無虞著該大臣飭令張運蘭迅速督率兵勇攻取嚴郡則左宗棠進取之師較易得手

上又命議政王軍機大臣傳諭僧格林沁吳棠曰曾國藩奏探聞僞普王楊輔青僞護王陳坤書均來蘇城與僞忠王商議皖浙官軍分路進剿上游無路可竄欲分大股由江陰福山楊林各口窺竄江北裏下河就食等語已寄諭都興阿督飭水陸各營嚴密防範裏下河完善之區賊匪垂涎已久況楊輔青等股敗賊窮無所之萬一乘閒偷渡不獨

裏下河被其蹂躪卽清江浦一帶亦必爲之震動
亟宜先事籌維以期有備無患僧格林沁所部馬
步各軍分剿皖豫山東捻匪已屬應接不暇自難
再撥勁旅駐紮清江著吳棠整飭各軍豫爲布置
如該匪有渡江消息卽著督兵前進會同都興阿
兵勇將敗殘股匪一鼓殲除僧格林沁公忠體國
素顧大局屆時如可分兵會剿諒該大臣必能相

機妥辦也

上又命議政王軍機大臣傳諭都興阿馮子材曰曾國藩奏稱探悉僞普王楊輔青僞護王陳坤書均來蘇城與僞忠王商議官軍分路進剿上游無路可竄欲分大股由江陰福山楊林各口窺竄裏下河就食等語裏下河關繫緊要屢諭都興阿嚴密防範現在楊輔青等股敗賊圖竄江北該處港汊

紛歧守禦萬分喫緊聞江面水師近來不甚得力
亟宜實力整頓以備不虞著卽嚴飭黃彬等督率
水師各營將沿江衝要處所不分晝夜逐段梭巡
如該師船巡防不力致該逆偷渡北岸擾及裏下
河完善地方定將黃彬等按照軍法治罪都興阿
所部陸軍並著勤加訓練嚴明紀律或於江陰各
口對岸豫先布置嚴兵以待策應水師俾逆匪無

隙可乘方爲妥善鎮城孤立江濱節經諭令馮子材審度萬全以守爲戰覽曾國藩所奏與連日所降諭旨適相脗合著馮子材仍遵前旨妥善籌固守俟鮑超攻克東壩溧陽等處再行督兵會合進剿與鮑超等聯絡一氣則聲援四應攻勦當可得手上又命議政王軍機大臣傳諭勞崇光晏端書曰前因江浙軍務緊要特派晏端書督辦廣東釐金接

身之... 四... 三... 一... 三... 四...
濟江浙等省軍餉著晏端書督飭派出道府各員
會同會國藩所委人員實力籌辦儘有該省官紳
暗中作梗卽著據實嚴叅江南軍務正有轉機不
得已藉廣東釐金以資協濟實爲大局所關儘該
督不與晏端書詳細籌商致令釐金一款毫無起
色惟勞崇光是問

上諭內閣曰僞保王童容海卽洪容海自詣鮑超軍

營投誠後卽率所部攻取廣德州城將守城悍賊
馬桂功擒殺並收其衆六七萬人一律薙髮當將
州城收復其被脅良民經曾國藩飭令總兵宋國
丞等發給護照川資分別遣散辦理尙屬妥善洪
容海身陷賊中數載既能自拔來歸復率衆效力
計取堅城襲殺守賊足見其從前被賊所脅並非
甘心從逆此次奮勉立功不無微勞足錄洪容海

著賞給遊擊銜以示獎勵其部下頭目王永虎等
均著賞給五品頂戴熊正玉等均著賞給六品頂
戴此外爲賊偏迫勉強脅從者正復不少果能悔
罪投誠獻城自贖殺賊立功各該督撫及各路統
兵大臣卽不准過事苛求一經奏聞無不予以自
新恩施立沛也

欽定勦平粵匪方略卷三百十九 壬戌年

八月二十二日 壬申 李鴻章奏冒僞碁王譚逆率

醜類繞出青浦縣直撲北新涇營七月二十六
日後復添僞主將蔡姓黃姓兩大股蔓延二三
十里不下十萬衆況文榜等併力抵禦屢被包
裏塞斷後路援兵不能遽達八月初一日賊用
稻草填濠我軍火器齊發燃燒稻草斃濠中悍

賊百餘初二日賊衆四五萬更番疊撲都司張
榮發苦戰受傷勢甚危險 臣先經密商 臣弟李
鶴章傳諭青浦及北簞山鳳凰山塘橋各營各
帶五成隊伍急趨泗涇七寶抄賊之後 臣親督
上海老營七成隊伍與程學啟等約期會戰於
北新涇並調浦東各營來援程學啟是日行抵
七寶譚逆率大隊擁至圍裏數重我軍奮力鏖

戰該逆大敗狂奔追殺十餘里生擒四百餘名
斬斃淹斃三千餘名賊夜遁野雞墩與蔡黃逆
衆仍圍新涇初三日臣督帶各隊與程學啟等
會於北新涇營外隨派隊分三路進剿程學啟
滕嗣武郭松林馳入況文榜等營中各隊鼓勇
爭先踏毀賊營十數座賊皆逃過吳淞江北岸
副將華爾帶常勝軍在法華援應署提臣黃翼

升聞警卽督水師由吳淞江進擊與敗賊相持
至夜四鼓礮聲如雷轟斃數百名又踏毀北岸
賊營七座賊乃退去初四日我軍撤回譚蔡黃
各逆又率衆回撲北新涇適參將劉銘傳等帶
隊赴援衝至野雞墩殺賊無算初五日追過南
翔賊已退向嘉定而去滬防肅清查譚逆糾黨
窺竄上海計極狡毒況文榜等守北新涇七晝

夜屹未動搖賊不敢舍之深入而程學啟諸將
神速赴機水陸中外各軍復合力追勦滬防危
而復安況文榜係應解皖省訊辦之員留滬以
來屢經大敵身受蔽傷實屬異常出力可否額

懇

天恩免其查辦留營差遣已革簡用總兵貴州定廣
協副將熊兆周等並請分別獎勵以昭激勸其

餘出力員弁兵勇容臣查明擇尤保奏

李鴻章又奏言湖州被圍五月有餘糧盡援絕
戰守極苦係千總熊得勝密約迎降以致湖城
淪陷熊得勝遂受檢點僞職七月二十日熊得
勝忽由賊中潛來上海洋涇浜臣飭藩司吳煦
密派員弁捕獲卽於軍前梟示以彰

國法而快人心至統領湖防道員趙景賢尙無下

落據被擒逃回之湖州人僉稱趙景賢被僞忠
王囚禁在蘇勸令投降該員矢志求死佯狂嫚
罵忠逆先加禮貌復加拷掠至手批其頰血流
面腫不爲少屈臣推原趙景賢從前死守湖州
之心當不肯遽墮名節湖人謂其城破被擒實
爲熊得勝所賣旁參衆證似尙可信奏入

上命議政王軍機大臣傳諭李鴻章曰逆匪垂涎滬

上已非一日現雖被創遁歸難保不去而復來李
鴻章務宜督飭將士分布要隘嚴申儆備毋令逆
蹤再行竄入昨據曾國藩奏稱俟太湖水師辦成
李鴻章可統水陸諸軍由松滬進兵入蘇該撫卽
隨時咨商曾國藩爲進攻蘇城之計步步移營以
剿爲防與鮑超東下之師兩路夾攻使賊匪備多
力分自不敢併向東趨致松滬各防爲所牽掣也

湖州失守趙景賢被執不屈大節凜然現尙被賊
羈禁蘇城仍著該撫隨時密探情形具奏

上諭內閣曰官軍勦賊獲勝北新涇立即解圍滬防
肅清仍著李鴻章督率各軍乘勝進勦痛殄逆氛
已革總兵況文榜係應解交曾國藩營訊辦之員
據李鴻章奏稱留滬以來屢經大敵身受礮傷實
屬異常出力著加恩暫免查辦留營差遣如始勤

終怠仍著解往訊辦已革簡用總兵貴州定廣協副將熊兆周著開復革職處分仍交軍機處記名遇有總兵缺出儘先提奏副將梁安邦著賞給健勇巴圖魯名號程學啟王東華均著以總兵記名簡放通判韓正國著免選本班以同知直隸州知州遇缺卽選都司張樹珊守備周盛波均著以遊擊儘先補用其餘出力員弁兵勇准其查明擇尤

保奏

二十三日酉癸多隆阿奏言探報石達開餘黨由

川竄踞鄖陽府屬之竹山竹溪等縣逆首陳得才馬融和等又自南陽率髮捻大股繞過浙川狂奔荆子關意在先竄鄖陽勾結二竹之逆進攻陝西興安府城臣軍援陝已次第馳近西安現奉

命回勦西竄之賊一面先派義中等五營馳回荆子
關以親兵兩營繼之並飭穆圖善馬步大營折
回商南迎勦一面飛檄雷正綰所部大營就近
由藍田探明捷徑馳往鄖陽之西迎頭夾擊臣
統帶馬隊居中策應似此三路進勦該逆既不
能再犯關中勾結回匪亦不致竄陷鄖陽糾合
川逆惟臣所部馬步除去疲病挑選精壯統計

不過七千餘人深恐不敷勦辦擬將前留廬郡
各營內調撥四營取道隨棗會合遏擊以厚兵
力奏入

上命議政王軍機大臣傳諭官文多隆阿駱秉章嚴
樹森曰粵捻大股欲由荆子關先竄鄖陽勾結二
竹逆匪進攻興安府城多隆阿現因兵力不敷擬
調廬郡所留四營會合攻勦惟廬郡相隔遙遠未

能卽時趕到多隆阿自應就現有兵力扼要截擊
雷正綰穆圖善兩軍及義中等營旣經多隆阿檄
令折回商南荆子關並分馳鄖西迎勦著多隆阿
卽督飭諸軍迅將此路逆匪掃除淨盡毋令別竄
他處復致滋蔓官文前已派何紹彩一軍馳赴鄖
陽著卽飭令與多隆阿兵勇會合夾擊並著官文
嚴樹森飭令金國琛梁作楫所部兵勇分投迎擊

雖驀越所慮者乘虛回竄游駛宛中又恐捨逆
敗匪結連勾合勦辦愈形棘手署臬司洪貞謙
帶領省防一營親軍百人於八月初十日出省
計時可抵葉裕參將盧得勝一軍歸其調遣仍
恐兵力不敷又添調汝營勇五百名卽日馳往
南陽統歸該司調度惟豫軍祇有此數愈分愈
單洪貞謙感奮馳驅雖不致遷延觀望然以少

禦衆勝算難操南陽一屬被匪蹂躪困苦不堪
惟有仰懇

天恩仍飭多隆阿親督各軍偵賊所向與豫軍會合
痛勦以期一鼓蕩平

鄭元善又奏言南陽解圍後經勝保會商派令
成祿馬陞王佐臣等軍繞至賊前迎勦臣飭盧
得勝與圖塔納金國琛實力追擊嗣勝保移師

赴陝金國琛回顧楚防祇慮得勝一軍兵力較
單致敗匪悉竄鎮平浙川一帶至竄河洛宜嵩
白楊樹等處係毫捻分股並非圍攻南陽之髮
逆臣忝任封圻責無旁貸現於二十四日出省
遵

旨馳赴河洛督勦何路緊急卽親赴何路策應不敢
藉詞耽延自干咎戾奏入

上命議政王軍機大臣傳諭鄭元善曰豫省各路地方任賊紛竄均未大加勦洗該撫卽迅赴河洛督飭諸軍速籌勦辦何路緊急卽親往何路策應粵逆大股已越浙川而奔荆子關欲竄鄖陽勾結由川竄擾二竹股匪以犯陝境多隆阿督率諸軍將欲竄陝省之豫捻認真堵勦勢難復顧南陽宛南軍務仍著鄭元善嚴飭洪貞謙等實力勦辦

二十八日

戊寅

慶端奏旨查閩省西路之建甯北

路之福甯與浙江衢處溫三府所屬連界賊以

巨股分屯浙東西之交疊陷處州郡縣悉力竄

撲衢溫兩郡無非爲犯閩之計臣抽調援浙之

軍派總兵秦如虎統帶由福鼎一路進兵道員

曾憲德駐紮福甯調度防勦參革道員張啟煊

就溫州號召民團助戰保溫郡以固閩北之防

委令總兵李定太總統衛防兵勇籌濟餉需而
調李元度率平江營壯勇扼紮江山總兵周萬
遠已革道員廖士彥督勇分駐仙霞關三鄉口
上臺一帶相爲犄角道員張銓慶帶贛豫勇駐
守龍泉總兵林文察副將曾元福帶臺勇由遂
昌前進堵剿兼施以固閩西之防各路又激勸
團練協力防堵故衢溫雖屢瀕於危賊蹤並未

聞入閩疆茲撫臣徐宗幹因節費起見調會憲
德回省經理局務而以福甯一帶防務責成知
府徐夔接辦廣東撫臣耆齡抵溫後並因各軍
有傷病疲乏者分別裁汰張銓慶所部除賴勇
八百人秦如虎所部除漳州兵二百一十人仍
留遣用外其餘與廖士彥都司楊鳳元所帶各
勇共四千餘人一併遣撤而派從九品鄢太愚

帶石字營粵勇千人馳赴遂昌扼紮大局所繫
未敢稍鬆臣與耆齡嚴激曾元福回軍松陽與
宣平遂昌兩路就近聯絡秦如虎率所部駐紮
青田與雲和景甯兩路就近聯絡以勦爲堵俾
免疏虞

慶端又奏言秦如虎林文察兩軍自遂昌埽蕩
溫瑞肅清傳聞浙東西之賊有調援金陵之說

卽經臣飭令乘閒合圖處州郡縣林文察等旋
克松陽縣治團勇進拔宜平已革知縣高樑材
與秦如虎派往之守備馬雲標等率隊直徧處
郡將城外賊壘踏毀林文察復督軍至處城西
南斬馘頗多現已克復處州郡城俟布置略定
卽圖進取

慶端又奏言據甯波文武稟報甯郡肅清後我

軍進攻餘姚未能得手派員馳赴上海添募壯
勇並約英法兩國輪船與副將華爾所派官兵
前來會勦新昌紳士孫善松等募勇助戰鄉團
共起殺賊七月初六日水陸各軍由南北兩岸
進擊斃賊甚夥初七日復合力攻勦直薄城根
殲賊多名我軍先將餘姚新城克復各隊乘勝
追殺恢復老城賊由上虞縣竄去等情容俟確

查詳細情形再行具奏

同日閩浙總督耆齡奏言左宗棠進攻龍游函約會勦湯溪臣以處城旣拔自應與浙師合力進取會商慶端先派知府康國器率飛虎等營廣勇四千餘名馳赴遂昌駐紮退賊南竄卽爲進攻湯邑之計擬俟處郡戡定將總兵秦如虎所部兵勇三千餘名副將袁良顛豫勇八百名

遊擊李朝安臺勇一千餘名分布處州松陽青
田縉雲等郡縣擇要駐紮自固藩籬抽調總兵
林文察副將曾元福遊擊白瑛等臺勇六千名
與康國器所部廣勇合成一萬餘人攻勦湯溪
聯絡浙師聲勢乃秦如虎請假慶端未與臣會
商輒行批准秦如虎復撥所部壯勇二千餘名
前往台州亦係遵照該督前札辦理慶端又欲

將林文察等臺勇六千餘名概行留防台處兩
郡稱俟將來或圖金華或勦另股此時不能抽
調僅屬臣飭康國器率廣勇四千餘名往攻龍
游湯溪臣疊次婉商撥勇會勦慶端堅執不允
查台州久經肅清但將縉雲仙居等縣防守嚴
密卽可爲台郡屏蔽處州各屬有留防兵勇五
千餘人亦已足敷分布何必停兵萬人守此一

郡近接探報左宗棠派隊攻克油埠賊巢正圖
掃蕩蘭谿河西逆壘以期合圍龍城與侍逆李
侍賢相持正急閩師大隊及時出攻湯溪可收
事半功倍之效若僅令康國器率四千之勇姑
爲嘗試該逆或前後夾擊或分股牽綴我師另
以大股徑趨龍泉窺伺江閩邊界康國器旣不
能回戈抵禦附近又無勁兵堪調截擊非但不

能協力圖功轉貽浙師牽掣之憂我軍亦有後
顧之患臣揣度情形目下斷難偏師輕進而事
機又萬不可緩相應請

旨飭下慶端恪遵前

旨將各營兵勇悉歸臣接統俾得相機調撥臣仍先

飭康國器於處州各屬激勸民團以助戰守並
督率各營防剿兼施如果機有可乘卽當妥速

進攻不敢以兵力較單坐曠時日

耆齡又奏言臣自到浦城防所留心查察福建

募勇領餉多有浮冒百弊叢生卽如已革道員

廖士彥所帶練勇祇一千三百名乃每月領餉

九千兩之多副將袁良所帶額勇八百名另有

餘丁二百名守備徐榮生所帶泉勇五百名虛

數尤多營官則交結糧臺翼長糧臺翼長則交

結統兵大員幕友內外勾通互相徇蔽臣前與
督臣慶端密商以己革道員廖士彥所部勇丁
龐雜疲弱難期得力應行裁汰因其現駐遂昌
防堵緊要擬俟續派石字等營到防再行遣散
以免疏虞乃該督隨營糧臺委員張其曜翼長
張文斌竟敢私自知會廖士彥謂其練勇已議
裁撤口糧軍火概不發給等語以致軍心惶惶

士民驚恐卽此足見在事各員但知營私罔顧大局現經臣會商慶端已將廖士彥之勇裁撤總兵秦如虎所帶漳州銅山等營兵勇道員張銓慶已革道員張啟燿所部練勇概行遣散副將袁良所帶贛勇餘丁亦卽革除並密飭知府康國器就近確查守備徐榮生所帶泉勇如有虛冒亦卽裁汰此外各營如有似此者隨時訪

查遣撤一面飛飭福建善後總局司道速將練
勇口糧議定畫一章程通飭遵辦以期勇得實
用餉不虛糜至候補知府張其隴建甯府知府
張文斌漏洩軍情未便稍事姑容相應請

旨革職解省審辦均奏入

上命議政王軍機大臣傳諭耆齡左宗棠徐宗幹曰
前將慶端補授杭州將軍耆齡簡放閩浙總督諭

令督率慶端所部各軍大張撻伐茲據耆齡奏屢
次婉商撥勇會剿慶端堅執不允總兵秦如虎等
並不遵調等語慶端於耆齡到浦後卽將援浙兵
勇移交接統何以耆齡與該將軍籌商進剿慶端
未能和衷殊不可解耆齡身任兼圻責無旁貸著
仍遵前旨檄飭閩省援浙各路兵勇統歸該督調
度以一事權惟慶端自出省防剿以來督率林文

察秦如虎等軍克復郡縣不少此次又克處州並
能固守閩疆不被該匪竄擾不得謂其所辦盡屬
非是今耆齡旣稱慶端意見與該督不符所有援
浙軍務卽專責耆齡督辦毋庸慶端襄贊調度如
耆齡久而無功較之慶端尙有不逮必當重治耆
齡之罪閩省兵勇援浙屢克城池奮勇善戰者諒
亦不少如林文察秦如虎等尤爲慶端部下得力

之將該督將廖士彥之勇裁撤並秦如虎所帶漳
州銅山等營兵勇道員張銓慶等所帶練勇概行
遣散慶端本日亦經陳奏第閩省兵勇裁汰過甚
該督所恃以衝鋒殺賊者勢不能不全仗廣勇者
歸膺茲重任務當籌畫萬全毋得豫存成見謂閩
勇盡不可用任令廣勇恣意橫行轉致不可收拾
台州等郡甫經克復亦須加意守禦不可任令空

虛左宗棠巡撫全浙耆齡督軍前來專爲援浙溫處等郡軍情左宗棠仍應主持其事嗣後如有與耆齡會同進剿之處務當隨時商推以期互相策應並著將閩省援浙軍情據實陳奏其處州餘姚克復詳細情形著耆齡左宗棠迅速查明具奏

上諭內閣曰福建候補知府張其隴建甯府知府張文斌於耆齡擬裁練勇未經宣布以前輒敢知會

帶勇官員致令軍心惶惑幾至激成事端實屬漏洩軍情著一併先行革職解省審辦用昭炯戒

二十九日

己卯

都興阿奏言上游賊匪被剿窮蹙

竊犯江防窺伺北岸現在各幫大小礮船僅二百八十六隻上自浦口下至狼福山分防六百餘里風浪稍阻卽難周徧前調廣東師船餉項無出其勢必須停止而江防日以喫重不能不

設法變通辦理所有江防船隻除查明堪以碇泊駐防者留用外其虧朽不堪使用者與其籌款興修莫若多造礮船分布協剿較爲靈便擬先行移知粵省督撫及江蘇撫臣停止前調廣東師船毋庸來江一面派員備款前赴湖北分廠趕造大中小三號礮船或百隻或數十隻卽由湖北招募勇丁一二千人順流東下似於軍

集之真原之田卷三十一
三十一
務有裨惟招募勇丁及各船篷索等項經費無
出勇丁入營並須就地先領一月口糧可否請

旨飭下湖廣督臣湖北撫臣派員照料籌給經費並
給一月餉銀准其作正開銷以示體恤之處出
自

天恩船隻造成隨時派撥水師護送東下俾免阻滯
至新造之船未到防船業經裁撤江而未免空

虛查有黃翼升所部現留三江營浦口分紮之
敵船八十隻應請暫留江面隨時調撥幫同駐
泊以備緩急所有各幫師船經黃彬親赴上游
察看臣同吳全美赴下游察看擇要分泊按段
巡防布置尙爲得法將弁兵勇亦尙整齊南岸
賊巢惟江陰一帶較多據探尙無動作臣於八
月十一日由靖江縣之八圩港登岸察看靖泰

各屬團練十四日回營其下游至通如所屬江
面吳全美前往按幫察看認真整頓奏入

上命議政王軍機大臣傳諭都興阿曰江防情形喫
重該將軍現會同吳全美察看上下游形勢擇要
巡防認真整頓所籌均屬周妥著卽照所擬辦理
廣東紅單船昨據勞崇光奏除去颶風沈失四號
外已將所存三十六號修好放洋勢難再令折回

該將軍卽可仍遵前旨辦理曾國藩前奏有太湖
水師尙未辦成黃翼升不可離滬之語是黃翼升
所部一時尙未能調至江北而江陰一帶賊船旣
多恐其別有詭謀裏下河防務要緊仍著都興阿
督同黃彬實力巡防毋稍鬆懈嚴划一節已寄諭
官文等遵辦

又命議政王軍機大臣傳諭官文嚴樹森曰都興

河奏江防船隻多有損壞擬派員前赴湖北趕造
人中小三號礮船或百隻或數十隻卽由湖北招
募勇丁一二千人順流東下惟招募勇丁及各船
篷索等項經費無出勇丁八營就地先領一月口
糧請由湖北給發等語現在江防喫重都與阿軍
營礮船不敷分布著官文嚴樹森俟該督委員到
楚卽派員妥爲照料籌給經費並給發一月餉銀

俾得趕緊造就隨時派撥水師護送東下無令阻滯所發經費餉銀等項並准其作正開銷